

AWIG-AWIG
DESA PAKRAMAN SUSUT KAJA



KECAMATAN SUSUT
KABUPATEN BANGLI
WARSA 2017

AWIG-AWIG DESA PAKRAMAN

Hal

MURDHA CITTA.....	1
PRATAMA SARGAH : Aran Lan Pawidangan Desa.....	1
DWITYA SARGAH : Patitis Lan Pamikukuh.....	2
TRIYA SARGAH : Sukerta Tata Pakraman	2
Palet 1 Indik Krama	2
Palet 2 Indik Prajuru Lan Dulun Desa.....	5
Palet 3 Indik Kukul.....	7
Palet 4 Indik Parum	8
Palet 5 Indik Druwen Desa.....	10
Palet 6 Indik Panyanggran Banjar.....	11
CATURTAS SARGAH : Sukerta Tata Agama	12
Palet 1 Indik Dewa Yadnya	16
Palet 2 Indik Rsi Yadnya	17
Palet 3 Indik Pitra Yadnya.....	14
Palet 4 Indik Manusa Yadnya	20
Palet 5 Indik Bhuta Yadnya	21
PANCAMA SARGAH : Sukerta Pawongan.....	22
Palet 1 Indik Pawiwahan	22
Palet 2 Indik Nyapian (Balu).....	25
Palet 3 Indik Sentana	27
Palet 4 Indik Warisan.....	28
SAD SARGAH : Sukerta Tata Palemahan	31
Palet 1 Indik Bhaya	31
Palet 2 Indik Karang Lan Tegal/Carik.....	32
Palet 3 Indik Pepayonan	33
Palet 4 Indik wewalungan	33
Palet 5 Indik Wewangunan	34
SAPTAMA SARGAH : Wicara Lan Pamidanda	35
Palet 1 Indik Wicara	35
Palet 2 Indik Pamidanda	36
ASTAMAS SARGAH : Nguwuh-nguwuhin awig-awig	37
NAVAMAS SARGAH : Samapta	38

MURDHA CITTA

Om Awighnamastu nama siddham,

Malarapan saking asung kerta lugraha, Ida Sang Hyang Widhi Wasa ngawentenang kahuripan sekala niskala, ring Bhuwana Agung lan Bhuwana Alit. Manut dresta Desane wantah pawakan pasayuban Krama Desa rawuhing kula warga pawongannia. Desane keanggehang Bhuwana Agung, pawongannia soang-soang pinaka Bhuwana Alit.

Sotaning Bhuana Agung, Desane wantah pawakan Bhuwana maurip jangkep saha Tri Hita Karananya luire :

ha. Parhyangan, sehananing kahyangan, penyiwian desa genah ngarcana Ida Hyang Parama Wisesa pinaka atma desane ;

na. Pawongan, krama saha warga desa maka sami maka pawakan Tri Kaya, mawaning desane sida molah maprawerti;

ca. Palemahan, tanah kakuwuban desa sinanggeh stula sariraning desane.

Adung patemoning bhuwana kalih, malarapan cantu Jagadhita, sinanggeh murdhaning prayojana pang riptaning awig-awig Desa adat/Pakraman ring paseban mami krama desa adat.

Pinaka putusing paseban; wastu prasida, prayojanan mami kabeh prasama angidep muwah amagehaken kadi ling ing awig-awig iki.

PRATAMA SARGAH ARAN LAN PAWIDANGAN DESA Pawos 1

- (1) Desa Adat puniki mawasta Desa Pakraman Susut Kaja
- (2) Jebar kakuwub wawidangannya mawates nyatur :
 - ha. Sisih wetan ring Desa Pakraman Manuk
 - na. Sisih kulon ring Desa Pakraman Selat
 - ca. Sisih lor ring Desa Pakraman Kebon
 - ra. Sisih kidul ring Desa Pakraman Susut Kelod

- (3) Desa puniki kawangun antuk karang ayahan desa, turmaning tumaning dados abanjar Banjar.

**DWITYA SARGAH
PATITIS LAN PAMIKUKUH
Pawos 2**

Desa Pakraman Susut Kaja ngamanggehang pamikukuh minakadi :

- ha. Pancasila;
- na. Undang-undang Dasar 1945;
- ca. Tri Hita Karana manut sadā cara Agama Hindu

Pawos 3

Luwir patitis lan Sesanti Desa Pakraman Susut Kaja

- ha. Mikukuhin miwah ngerajegang Sang Hyang Agama;
- na. Nginggilang tata prawertine maagama.
- ca. Ngerajegang kasukerta desa saha Pawongannia sekala lan niskala.
- Ra. Mikukuhin Awig-Awig, pararem lan pasuara.

**TRITIYA SARGAH
SUKERTA TATA PAKRAMAN
Palet 1
Indik Krama
Pawos 4**

- (1) Sane kabaos Krama desa inggih punika kulawarga sane meagama Hindu saha ngemong karang Desa utawi jumenek ring wawidangan desa;
- (2) Sajaba punika sinanggeh tamiyu, sane kabinayang dados kalih inggih punika sane meagama Hindu, miwah sioosan Hindu.

Pawos 5

Krama Desa Pakraman/Adat wenten 3 (tigang) pawos :

1. Krama ngarep, kulawarga sane melarapan wed utawi pengrawuh saking warga desa sewosan saha ajeg pawiwahania
2. Krama tan ngarep, luire:
 - ha. Silih tunggil kulawarga sane tan ngarep ring Desa kemawon ring banjar kantun ngarep;
 - na. Krama penyada, inggih punika krama sane sampun megat ayah kagentos antuk ahli warisnia.
 - ca. Krama penyade, ingih punika krama sane ngentos ayah krama ngarep wiyadin tan ngarep tur sane kadadosang sekaa truna truni ring Banjar
3. Krama balu, kula warga ngarep utawi tan ngarep salah sinunggil rabi utawi istrine lina, wiadin nyapian;
 - ha. Balu mekrambian / magebeg, inggih punika balu sane maduwe sentane dereng merabian;
 - na. Balu ngelisting, inggih punika balu sane tanpa sentana

Pawos 6

1. Ngawit dados Krama Desa:
 - ha. Sangkaning ngamong karang lan siosan punika;
 - na. Mawiwit pawiwahan.
 - ca. Sangkaning nyepih, numbas, ngewaris, ngidih lan sapanunggalannya karang ayahan Desa ;
 - ra. Sangkaning pinunas ngeraga utawi jenak mapaumahan ring wewidangan Desa Pakraman Susut Kaja saha kacumponin olih Krama miwah Prajuru, lan kangkat makrama tan ngarep.
2. Panemaya tedun makrama desa :
 - ha. Nyabran sasih Kasanga saha majalaran antuk tatengeran arep ring krama sane ngamongin ayahan desa;
 - na. Ngantos 6 (enem) sasih mawiwit pawiwahan.

Pawos 7

Tategenan miwah swadharma Krama Desa Pakraman Susut Kaja ;

(1) Tategenan krama, luire :

- ha. Krama ngarep, keni urunan miwah ayahan mamungkul,
- na. Krama balu, keni ayah manut kawongania:
 - 1. Balu ngelisting, lanang utawi istri keni ayahan lanang utawi istri
 - 2. Balu makrambian, lanang utawi istri sane madruwe sentana lanang utawi istri sampun mayusa 17 (pitulas) warsa keni ayahan balu.
 - 3. Balu Nyapian, kadadosang luput pepeson sakewanten keni ayah manut arah-arahan banjar/ Desa Adat Pakraman yening balu lanang ayah lanang, balu istri ayah istri.
- ca. Krama tan ngarep keni ayah ayah kepeah dados tiga luire : sekehe gong, sekehe baris, pecalang lan hansip, tiosan punike keni urunan penekel manut kesungkeman, tan marep keni ayah-ayahan sakadi mareresik ring Kahyangan Tiga, banjar lan tiosan manut ring kawigunan.

(2) Krama Desa Pakraman Susut Kaja kadadosang.

- ha. Mapuangkid utawi tan tedun luire:
 - 1. Ritatkala mapawangun/nasarin, ngerabin sanggah, piasan, bale daja, bale dangin, bale dauh, kelumpu miwah paon;
 - 2. Ritatkala mayadnya, ngotonin sane kapertama, nyakapang, masangih, mapasaksi, kicalang putra, sakit lan patirtan;
 - 3. Maluasan utawi ngluang;
 - 4. Sangkanin sungkan lan metepetin sungkan rahat.
- na. Nyada. Mapiteges wusan ngayah, risampun mayusa 70 (pitung dasa) warsa mungguh;
- ca. Mogpog/ nekel ngetut wiadin ngetut ayah saha papeson antuk brana, manut pararem, majeng ring krama Desa sane magenah ring tiosan Desa Adat Pakraman.
- ra. Panyeledihi nyada wiadin nyuksukin ayah ri sampun mayusa 17 (pitulas) warsa.

Pawos 8

Kapatutan krama tamiyu:

- ha. Krama tamiyu patut madana punia ring Desa manut pararem.
- na. Krama tamiyu patut polih patus marupe pitulung ring sejeroning katiben panca bhaya.

Pawos 9

(1) Wusan dados krama Desa, luire:

- ha. Sangkaning pinunas ngaraga, menawi kesah ke dure desautawi nglangkungin segara;
- na. Kenorayang, duaning sampun tan prasida ngeahin solah maprawerti setata mamurug kecaping awig-awig.

(2) Sang wusan mekrama:

- ha. Patut ngaturang ayahan ke desa;
- na. Tan polih pah-pahan sangkaning padruwen desa sajawaning pah-pahan padruwen ring tempak manut pararem;
- ca. Tan polih pasayuban sajeroning ala ayu;
- ra. Prade sangkaning rahayu, polih lekita bukti patilar saking prajuru desa.

Palet 2 Indik Prajuru Lan Dulun Desa Pawos 10

(1) Desa Pakraman Susut Kaja kaenter antuk Bandesa ;

(2) Bandesa patut ;

- ha. Mawiwit sakeng Krama Desa Ngarep ;

- na. Keadegang malarapan antuk pamilihan ring paruman, saha Prajuru soang-soang taler keadegang nyabran 5 (lima) warsa, sejawaning wenten perindik tios kangkat kepilih malih ;
- ca. Patut nincapang kaweruhan ring sulur Agama lan Adat, turmaning tan ceda angga, ceda budi lan sapenunggalanya saha tan kapilalang antuk Uger-Uger Panegara ;
- ra. Maduluran Dewa Saksi ring Pura Desa ;

Pawos 11

- (1) Bandesa kesanggra antuk:
 - ha. Klian Banjar Adat;
 - na. Panyarikan pinaka Juru surat:
 - ca. Pasedahan pinaka Juru Raksa Desa;
 - ra. Kasinoman pinaka juru arah akehnia manuk awigunan saha magilir nyabran sasih.
- (2) Sajeroning ngenterang sukertan niskala, Bandesa mingsinggihang pamangku Kahyangan Desa.
- (3) Prajuru ngadegang Panglingsir utawi Dulu utawi Pamucuk sinanggeh kerta desa, sane mawiwit Prajuru lepas, sang wikan ring adat agama; adiri sinanggeh panua kesarengin juru surat sakeng penyarikan desa

Pawos 12

- (1) Swadharmaning Bandesa luire:
 - ha. Ngenterang pelaksana sadaging awig-awig miwah perarem desa;
 - na. Nuntun tur ngenterang krama rawuhing warga desa ngupadi kasukertan antuk patitis;
 - ca. Mawosin kalih niwakang pemutus marep ring wicara warga desa;
 - ra. Maka duta matemuang bawos ring sapa sira ugi.

- (2) Prade Prajuru utawi dulu iwang panglaksana keni pamidanda nikel ring kaiwangan soang-soang krama saha kangkat kararyanang manut pararem

Pawos 13

Patias utawi olih-olihan Prajuru utawi Dulu Desa luire:

- ha. Luput rerampen (peson-peson);
- na. Polih tanding tengah;
- ca. Petias sewosan manut pararem;

Pawos 14

(1) Prajuru utawi Dulu Desa kagentosin riantukan :

- ha. Seda;
- na. Tutug panemaya;
- ca. Wit saking pakayunan utawi pinunas ngraga.
- Ra. Kanorayang duaning iwang pamargi manawi nilar sesana.

(2) Nganorayang utawi ngentosin Prajuru utawi Dulu-dulu patut sejeroning paruman tur keingkupin antuk Krama Desa.

Palet 3

Indik Kukul

Pawos 15

(1) Kukul ring Desa luire :

- ha. Kukul Desa Pakraman Susut Kaja;
- na. Kukul sekaa-sekaa;

(2) Tabuh tetepakan kukul Desa :

- ha. Atuludan lambat , tatengeran tedun ngayah;
- na. Atuludan bulus, tatengeran kepancabhayan;
- ca. Tigang kelentungan banban, tenggeran patedunan wangde ;

- (3) Tengeran kulkul ring soang-soang bebanjaran :
- ha. Kalih tuludan bulus, tatengeran ngerorod (nganten);
 - na. Kulkul kelayu sekaran (lina);
 1. Atuludan lamban, tengeran mitahuang (kulkul desa);
 2. Kalih tuludan lamban selanturnya, nedunang banjar.

Pawos 16

- (1) Kulkul Desa utawi banjar tan wenang katepak yening tan sangkaning pituduh Prajuru Desa, utawi Prajuru Banjar sejawaning tengeran kepancabhayan.
- (2) Sang nepak tan sangkaning pituduh patut digelis atur supeksa maka buatan panepake, yan tan sapunika, patut sang mamurug kadanda manut pararem.
- (3) Suaran kulkul, tenggeran kepanca bhaya patut ketedunin antuk Krama desa saha makta gagawan anut bhaya ;
- (4) Kulkul sekaa-sekaa, semalih kulkul pondokan tan keluarga nyawerin (matehin) sukat utawi tengeran kulkul Desa/Banjar prade mamurug taler kadanda manut pararem.

Palet 4

Indik Paruman

Pawos 17

- (1) Paruman/sangkepan ring Desa Pakraman Susut Kaja, wenten :
 - ha. Paruman desa, kawentenang :
 1. Nyabran ngasasih , maka cihna tanpa arah-arah, duaning sampun tetep panemaya manut pararem bebanjaran soang-soang.
 2. Napkala (padgata kala) maka jalaran arah-arah manut tetujon.
 - na. Sangkepan Prajuru utawi dulun Desa, Kawentenang manut wiguna;
 - ca. Paruman Sekaa-sekaa manut babuat.
- (2) Paruman desa utawi Banjar madudonan sakadi ring sor :

- ha. Prasida lumaksana risampun katedunin antuk sang patut ngamiletin kemanggala antuk tengeran kulkul miwah mabusana adat, saha tan kalugra makta gagawan sakaluire: tan maren ngarcana ring Ida Bhagawan Panyarikan saha Widhi Widana Cane;
- na. Maka sarana jagi pangawit kalaksanayang sep-sepan saha ri wusannia nyacah dadosan gung alit manut pararem;
- ca. Tan kalugra ngawetuang suara ghora utawi byuta, yan wenten asapuniki keni pamidanda beya pacamil kadi dandaning nguman-uman ring shaba;
- ra. Pamutus babawos beriuik sapanggul (ingkup) punika kamanggehang.

- (3) Prade pidaging paruman tan kacumponin, mangda Prajuru Desa utawi Banjar ngilikang babaos, saha putusannia mangda karareman antuk Krama Desa utawi Banjar, malih prade tan prasida kasungkemin jantos ping tiga, Prajuru Desa utawi Banjar dado nunas bawos ring Kerta Desa manut undangan luire : kamanggeh paingkupan prajuru, ngeraris panglingsir, panguntat paruman.

Pawos 18

- (1) Sajeroning paruman Desa, Bandesa Adat /Pakraman patut nyiarang pamargi ngenterang desa, pemekas ngenenin indik:
- ha. Munjuk lungsuring pakraman saha ayah-ayah, sulur arta berana, druwen desa;
 - na. Pidadab Prajuru ngenenin usaha desa kapungkur
- (2) Pamutus paruman desa sinanggah pararem, maka pamitegep pamargin Awig-awig.

Pawos 19

- (1) Sangkepan prajuru Desa ngawedarang rarincikan usaha desa kapungkur.
- (2) Sangkepan Prajuru utawi Dulun Desa tan kawenang ngwedalang tategenan ring krama sadereng kaingkupin antuk Krama Desa.
- (3) Pamutus sangkepan Prajuru utawi Dulun Desa ngewetuang paswara, maka daging pituduh sang ngawewenang utawi ngonekang pecak pararem Krama Desa

Palet 5

Indik Druwen Desa

Pawos 20

- (1) Padruwen Desa Pakraman Susut Kaja sakadi ring sor :
 - ha Kahyangan Desa, luire :
 1. Kahyangan Tiga
 2. Pura Melanting
 3. Pura Taman Sari
 4. Pura Sulangai
 - na. Balai Pasamuan (Bale Desa Pakraman utawi bale Banjar);
 - ca. Tanah laba Pura ;
 - ra. Karang ayah Desa, karang ring ajeng
 - ka. Tunon lan Setra.
 - da. Gong Gede:
 - ta. Ilen-ilen walin pura : Rejang, Pendet, Baris ;
 - sa. LPD (*lembaga Perkreditasi Desa*)
 - wa. Lekite lekite luwire : Pipil Krama, Awig-awig, pararem ;
 - Ia. Sasanti, Kulkul, Nyasa ;
- (2) Olih-olihan Desa Pakraman Susut Kaja luire :
 - ha. Olih-olihan saking pelaba Pura

- na. Urunan Krama Desa Adat;
 - ca. Paica saking Guru Wisesa;
 - ra. dana punia tiosan, sane patut.
- Ka. Pahan prabia pawangunan saking LPD ;

Pawos 21

- (1) Prajuru Desa patut ngetangang pamupon laba Pura lan sapenunggalan druwen Desa;
- (2) Pikolih lan pamuponnya keanggen prabeya piodalan saha wewangunan ring Pura miwah anggen kabuatan desa adat;
- (3) Nyabran pasangkepan desa, Prajuru pengemong druwe Desa ngawentenang parindik munjuk lungsuring padruwe ring Krama Desa;
- (4) Sakaluri druwen Desa patut wenten ilikitannya;
- (5) Tan kalugra ngadol utawi ngesahang padrwueyan Desa yan tan kasungkemin antuk Krama Desa.

Palet 6

Indik Panyanggran Banjar

Pawos 22

Krama Desa rikala ngawentenang karya suka-duka, patut kasanggra antuk banjar, luire :

- ha. Prada ngewangun pitra yadnya utawi manusa yadnya, manut pinunas sang meyadnya;
- na. Pangrombo utawi karya gotong-royong krama jantos ping tiga, selangkungan punika patut katuran pangu;
- ca. Pangu rikala pitra yadnya anut abot yadnya, aprada saking semengan ngantos wengi, katuran pangu ping kalih ;
- ra. Upacara Pitra Yadnya kemargiang risampun polih uwak-uwakan prajuru Desa ;

CATURTAS SARGAH
SUKERTA TATA AGAMA
Palet 1
Indik Dewa Yadnya
Pawos 23

- (1) Palingih panyiwiyen sawidangan Desa Pakraman Susut Kaja luire :
 - Ha. Kahyangan Tiga : Pura Desa/Bale Agung, Pura Puseh miwah Pura Dalem;
 - Na. Pura Prajapati;
 - Ca. Pura Melanting;
 - Ra. Pura Taman Sari;
 - Ka. Pura Sulangai;
 - Da. Pura Catuspata;

- (2) Rahina Piodalan soang-soang kahyangan inucap, kadi ring sor :
 - Ha. Pura Bale Agung, Pura Puseh rikala Anggara Kasih Wuku Medangsia
 - Na. Pura Dalem, Pura Prajapati rikala Buda Umanis Wuku Tambir
 - Ca. Pura Melanting, Pura Catus Pata rikala Buda Wage Wuku Kelawu
 - Ra. Pura Taman Sari rikala Anggara Kliwon Wuku Prangbakat
 - Ka. Pura Sulangai rikala Anggara Kasih Wuku Dukut

- (3) Pengaci ring pura inucap manut kecap sastra agama, saha kelaksanayang nista, madya, utama. .

- (4) Soang-soang Pura inucap ring ajeng kaempon olih karma Desa Pakraman Susut Kaja.

Pawos 24

- (1) Ring soang-soang Pura inucap kewentenang Pamangku.
- (2) Ngadegang Pamangku manut dadudonan :

- ha. Nyanjan utawi masemurang, soang-soang mapiteges mapinunas ring ajeng penataran wiadin ke pura desa manawi ring balian sonteng, lan sapanunggilan.
 - na. Turunan utawi ngewaris;
 - ca. Kacatri, kapilih, katunjuk oleh krama desa.
- (3) Tan kewenang keanggen pamangku, luire :
- ha. Cedangga, luire peceng, perott, cungh lan sapanunggilannya;
 - na. Sang sapasira ugi sane tan kepatutang patut pararem;
 - ca. Sakit ila, ayan, buduh, wiadin edan;
 - ra. Sane madrebe kasucian urip tan becik.
- (4) Prabea kapamangkuan :
- ha. Madiksa Widhi (ngewintenin) kemedalin saha kelaksanayang antuk sang ngadegang makadi krama desa utawi pangempon pura soang-soang;
 - na. Pitra Yadnya ri wekas prade kulawarga pamangku tan mrasidayang, patut kasungkemin antuk krama desa utawi pangemong sanistania brahmana prayascita manut pararem.
- (5) Pamangku patut ngamanggehang sesaning pamangku, luire tan wenang ajajuden miwah sane siosan.

Pawos 25

- (1) Swadharmaning pamangku luire :
- ha. Ngenterang upacara piodalan ring kahyangan utawi ring soang-soang pakubon krama;
 - na. Tan wenang salab-sulub, yan mamurug wenang pamangku inucap nyepuhin raga;
 - ca. Prada salah sinunggil pamangku kapialang utawi cuntaka, kengin nyelang pamangku kahyangan tiga siosan;

ra. Semalih yan sampun pamangku tigang rahina ring Pura kancit wenten kulawarganya utawi pisaga lan pengarep lian, pamangku inucap tan keneng cuntak sakewanten pamangku tan budal selami piodalan.

(2) Petias utawi olih-olihan pamangku, luire :

ha. Polih pahan sarin canang saking atura upakara manut pararem;

na. Luput pakaryan rerampen;

ca. Busana arangsukan manut pararem;

ra. Tios-tiosan manut pararem;

Pawos 26

(1) Pamangku kagentosin riantukan :

ha. Lina,

na. Pinunas ngeraga, menawi kegeringan lan sapanunggilannya;

ca. Kawusanang antuk krama menawi melaksana sane tan patut (asta dusta).

(2) Prade pamangku kawusang sangkaning melaksana asta dusta, keni pamidanda manut pararem saha ngewaliang pabeya pawintenan pecak.

Pawos 27

Kasukerta kahyangan ring Desa :

(1) Sane nenten kalugra ngranjing ka pura luire :

ha. Sane nenten klugra ngranjing kapura luire :

1. Sebel kandel, ngeraja swala, selami dereng mabersih;

2. Sebel madrue putra, sajering 42 rahina, kruron;

3. Sebel pengantenan, sedereng mabiakala;

4. Cuntaka sangkaning kapademan manut senger;

na. Sang patitis utawi anak babinjat;

ca. Makta sehananing sane kasinangeh ngeletehin.

ra. Wewalungan suku pat, sejawaning ritat kala mapapada

ka. Mabusana sane tan patut kadi tata caraning ngranjing kapura;

- da. Anak alit sedereng mayusa tigang sasih;
 - ta. Sedereng polih wak-wakan (pituduh) prajuru desa adat/ pakraman.
- (2) Busana ngeranjing kapura wenang nganutin dresta minakadi;
- ha. Ritatkala ngaturang ayah, mawastra lan nylempot;
 - na. Ritatkala ngaturang sembah, mabusana jangkep;
 - ca. Siosan kadi ring ajeng nenten kelugra, sajawaning sampun pituduh prajuru.
- (3) Parilaksana tan kawenangan ring pura luire :
- ha. Mabawos sane kasinanggeh wak purusya, wak capala
 - na. Makoratan / mabacin, mawarih, masangama;
 - ca. Masumpah utawi macoran, sajawaning pituduh prajuru desa;
 - ra. Ngias raga sajawaning pandita miwah pinandita;
 - ka. Munggah tedun palinggih sajawaning prajuru desa;
- (4) Sang mamurug kadi kecaping ring ajeng, keni pamidanda pamerayascita sepatutnyane.

Pawos 28

- (1) Yan wenten jatma kerawuhan ring pura, kengin patut kapintonin prada rumasa kasumangsayan, yan tan wiakti jatma inucap kasisipang manut pararem.
- (2) Prada kahyangan kahanan dur manggala, minakadi kapanca bhaya, pamangku patut digelis nyadokang ring prajuru mangda marumang krama desa tur ngawentengan upacara sepatutnyane.

Palet 2
Indik Rsi Yadnya
Pawos 29

- (1) Sang pacang madeg pandita utawi pinandita minakadi Balian sonteng, Kebayan, saluire jagi ngenterang yadnya patut masadok ring prajurudes, kalih parisada Hindu Dharma Indonesia.
- (2) Prajuru desa patut nitenin tur wenang ngalangin, prada wenten kacihna lempas ring kakecap miwah drestane, tur sareng nyaksiang upacara saha nyiarang ring paruman desa tegep rauhing wates kawenangaan panganter yadnya.
- (3) Krama desa patut ngaturang ayah sapamadeg miwah ring panglepas sang sulungih ring wekas katuntun antuk prajuru.

Pawos 30

- (1) Sang sulungih patut ngeriyinang ngrayoning ring wawidangan Desa Pakraman Susut Kaja sesampune wawu muputang yadnya ke jebar jagat utawi ke dura Desa.
- (2) Krama Desa sami patut sareng niltenin katuntun antuk Prajuru, mangda sahanan yadnya sane kawentenang kaicen pamuput oleh Pandita utawi Pinandita manut kawengannya soang-soang.

Palet 3
Indik Pitra Yadnya
Pawos 31

Dudonan pamargin pitra yadnya.

- (1) Pangupakara sang lina;
 - ha. Antuk mendem utawi ngeseng, makacihna pakingsan ring Ibu Pertiwi utawi ring Bhatara Brahma selami nuptupang prabeya.
 - na. Atiwa-tiwa (upacara pangabenan utawi plebon)

- (2) Upacara-upacara Pitra Yadnya ri wusan keabenang mewastu mungah daun bingin (ngroras) ri sampun wawu ngamargiang nglinggihang Dewa Hyang (Bhtara Batari)

Pawos 32

Swadarmaning lan tatenganan krama prade wenten sinaling tunggil warga lina;

- (1) Sang kaduhkitan patut;
 - ha. Nya'dokang ring klian tur nunasng tatimbangan ring kawentenayane;
 - na. Ngaturin banjar ngrombo makarya eteh-ete sawa kadulurin panyembrahma canang sasidan antuk.

- (2) Swadarmaning Krama Desa;
 - ha Klian Banjar maritatas pamargin sang kaduhkitan, napike pacang kapende, makingsan riyin utawi lantur keabenang;
 - na. Prada kapendem, raris kawentenang kulkul patanu manut pawos 15 (3) aksara na, antuk klian banjar utawi wakilnya.
 - ca. Panyangran Banjar selanturnya :
 1. Soang-soang krama banjar nedunang patus a kg beras, adeng miwah kelapa sawungkul.

2. Ngerombo ngaryanin eteh-ete sawa saha kasarengin antuk krama sane rauh, maksian;
 3. Sami Krama Banjar nganter ke setra jantos pamendem puput;
 4. Tan kengin ngelelet langkungan ring 7 (pitung) rahina, tur patut polih gebagan anut paentengan klian banjar.
 5. Tan kalugra nginepang bangbang.
- (3) Prade wenten lina, rikala piodalan ring pura, kengin mendem tan pasadaok tur memargi wengi utawi kasetra siosan (setra pakingsan)

Pawos 33

- (1) Sane kasinangeh kacuntakan sekadi ring sor :
- ha. Cuntaka antuk lina;
 - na. Cuntaka antuk ngraja swala;
 - ca. Cuntaka antuk ngembasang putra;
 - ra. Cuntaka antuk kruron;
 - ka. Cuntaka antuk pawiwahan;
 - da. Cuntaka antuk gamia gamana;
 - ta. Cuntaka antuk salah timpal;
 - sa. Cuntaka antuk yening wenten anak istri mobot nenten kaupakaran pabiakawonan tur pawidi widana;
 - wa. Cuntaka antuk mamitra ngalang;
 - la. Cuntaka antuk wenten anak istri ngwentenang putra sadurung maupakara pabiakawon tur pawidi widana.
- (2) Sengker cuntaka manut kawentenannia :
- ha. Cuntaka kelayu sekaran, cuntakania kantos masapuh manut dresta;
 - na. Cuntaka ngraja swala, 3 rahina ngawit sakeng ngraja swala utawi selamaning ngraja swala;

- ca. Cuntaka ngembasang putra, 42 rahina (abulan pitung dina) ngawit saking putrane embas, utawi ngantos sampun kaupakara makambuhan tur maprayascita manut sekadi agama lanang wiadin istri;
- ra. Cuntaka kruron abulan pitung dina (42) rahina tur sampun matirta pamerascita;
- ka. Cuntaka pawiwahan, cuntakanya ngantos sasampun matirta pabiakaonan;
- da. Cuntaka gamia gamana, cuntakania ngantos sesampune kapalasang/masapihan tur sampun kawentenang pamrascita desa pakraman/kahyangan.
- ta. Cuntaka salah timpal kapuputang sekadi ring agama hindu tur dresta/adat.
- sa. Cuntaka anak istri mobot nenten kewentenang upakara pabiakaonan, cuntakania ngantos kawentenang upakara pabiakaonan;
- wa. Cuntaka mamitra ngalang cuntakania ngantos kawentenang upakara pabiakaonan;
- la. Ngembas putra nenten kawentenang upakara pawidi widana, cuntakania ngantos wenten sane mameras sang putra, tur sampun kawentenang upakara sekadi ring ajaran Agama Hindu.

(3) Cuntaka kelayu sekaran / kapademan :

1. Cuntaka/sebel banjar rauhini 3 rahina ri wusan mendem utawi sesampun polih prayascita (masapuh).
2. Kaluargania sajeroning pakarangan ngantos roras rahina.

na. Kaaben cuntakannia :

Sang nyambut kayra pitra yadnya cuntakania ngawit sakeng ngrancang karya rauh riwus yadnyania (mapegat).

(4) Tan keneng cuntaka luire :

ha. Sang sulinggih lam Mangku Kahyangan Tiga.

Na. Ri kala piodalan.

Pawos 34

- (1) Atiwa-atiwa (pangabenan) kamargiang madasar antuk :
 - ha. Nyawa resi (nyuasta geni), santukan tan ngagah utawi menawi tan kakeniang;
 - na. Sawa preteka
- (2) Panemaya pangabenan wenten 2 pawos :
 - ha. Ngaben dadakan/bah bangun, kadadosang sajeroning tempekan / banjar;
 - na. Ngaben ngamasa.
- (3) Dudonan pangabenan ngawit saking ngagah (lina) ngeseng ngantos pangiriman utawi nganyut.

Pawos 35

- (1) Papatusan pangabenan wenten kalih pawos :
 - ha. Ngaben ngamasa, luire : beras, arta brana siosan, ayam asiki, kelapa abungkul miwah (manut pinunas sang madurwe yadnya);
 - na. Ngaben dadakan, pateh sekadi patus lina kapendem,.
- (2) Pangingune ring krama banjar ngawit makarya anut abot kawentenang karya

Palet 4

Indik Manusa Yadnya

Pawos 36

- (1) Manusa yadnya inggih punika upacara-upacara dharmaning kauripan manusa, ngawit saking patemoning kama bang lan kama petak sajeroning garba ngantoslampus ri wekas.
- (2) Upacara kadi ring ejeng madudonan kadi ring sor :
 - ha. Magedong-gedongan duk pengerempinian ibiang;
 - na. Duk sang rare medal;
 - ca. Kepus udel;

- ra. Roras rahina;
- ka. Titug kambuhan (42 rahina)
- da. Tigang sasih (3 bulan)
- ta. Pawetuan/oton/odalan (6 bulan)
- sa. Tutug kelih (ngeraja wadone, ngembakin lanangne)
- wa. Matatah/mapandes;
- la. Mawiwaha;
- ma. Mawinten.

- (3) Upacara-upacara inucap kamargiang nista, madya utama manut sastra agama saha catur dresta, maka buatan desa, ngawinang sima cara desa.

Palet 5
Indik Bhuta Yadnya
Pawos 37

- (1) Bhuta yadnya inggih punika upacara-upacara : biakala ring pertiwi lan kahyangan, sarwa prani saha upacara-upacara ring babutan.
- (2) Upacara pabiakala ring ring sarwa prani luire :
- ha. Ring sarwa tumuwuh ri kala Tumpek Pangatang (Saniscara Kliwon Wariga);
 - na. Ring sarwa ingon-ingon ri kala TumpekAndang (Saniscara Kliwon Uye).
- (3) Upacara pabiakala ring pertiwi, kahyangan lan babutan kewastanin macaru.
- (4) Pacaruan inucap ring ajeng nista, utama manut wiguna kadi ring sor :
- ha. Eka Sata; ka. Resi Gana;
 - na. Panca Sata; da. Panca Kelud;
 - ca. Tawur Agung; ta. Balik Sumpah.
 - ra. Panca Sata;
- (5) Sajawaning kadi ring ajeng kawentenang upacara :
- ha. Majot-jotan utawi yadnya sesa nyabran wusan ngerateng.
 - na. Masapuh-sapuh rikala pacang wali ring pura.

Pawos 38

- (1) Nangken ngewarsa rikalaning Tilem Kesange kawentenang tawur kesanga, ketah kabaos Ngerupuk, makecihna pacang mapag rainan Panyepian Benjangne.
- (2) Upacara panyepian sane kamargiang antuk Krama Desa;
 - ha. Amanti geni : tan kengin meapi-api;
 - na. Amati karya : tan kengin yambut karya;
 - ca. Amati lelanguan : tan kengin maoneng-onen, masuara gora, lan sapanunggalannya;
 - ra. Amati lelungan : tan kengin melancaran marika-meriki
- (3) Paberatan inucap kamargiang sakeng semeng ngantos ngedas lemah.
- (4) Sang mamurug kecaping ajeng keni pamidande manut pararem ring banjar / tempek soang-soang kamargiang atuk patilik (Pacalang Desa)
- (5) Riwus rahina Nyepi (benjangne) maka cihna pangawit Icaka Warsa patut soang-soang warga desa saling ngaksama (Dharma Santi)

PANCAMA SARGAH SUKERTA PAWONGAN

Palet 1

Indik Pawiwahan

Pawos 39

- (1) Pawiwahan inggih punika patemoning purusa pradana malarapan panunggalan kayun suka cita kaduluri upasaksi sekala-niskala.
- (2) Pamargin pawiwahan luire :
 - ha. Pepadikan, kamnggala antuk pakrunan;

- na. Ngrorod, ngrangkat riin wawu kakrunayang;
 - ca. Kasudiang prade pangambilan sios agama.
- (3) Pidabdab sang pacang mawiwaha patut :
- ha. Sampun manggeh daha trunha (presida nganuti Undang-undang perkawinan)
 - na. Sangkaning pade rena (tan kapaksa);
 - ca. Kasudiang prade pangambila sios agama.
- (4) Pamargin pawiwahan mangda nganutin Undang-undang Perkawinan saking ngawiwenang.

Pawos 40

- (1) Pawiwahan sane kepatutang ring desa sekadi ring sor :
- ha. Sampun kamargiang pabiakala utawi kasaksiang sekala niskala antuk pandita/ pinandita;
 - na. Wenten pasaksi prajuru sane mapakilingan utawi ngilikitayang pawiwahan.
- (2) Prabian sane tan manut kadi ring ajeng sinanggeh tan patut.

Pawos 41

Tata caraning perabian :

- (1) Sapa sire ugi pacang ngewarangan pakulawarga patut masadok ring prajuru, selanturnya prajuru maritatas, manut tan manut kecap perabiane;
- (2) Pamargin papadikan manut dudonan :
- ha. Pakrunan jantos pang tiga, sahe soang-aoang malarapan :
 1. Kapaetama antuk canang;
 2. Kaping kalih antuk canang lan sajeng;
 3. Kaping tiga antuk tipat bantal, kabawos pamuput papadikan.

- na. Ri sampun mapragat raris sang istri keajak budal ring pakubon sang lanang, saha kelanturang antuk pabiakala.
- ca. Mangda puput tumus sekala-niskala, raris kulawarga purusa makta pejati ring merajan wadone.

(3) Prade ngerorod utawi merangkat patut :

- ha. Rerama lanang ngawentenang pamalaku antuk duta saksi sakiranya 2 (kalih) diri.
- na. Pagenahan antene tang kengin ring pakubon sang lanang sedreng mabyakala.

(4) Sajeroning pakrunan / pengelukuan patut :

- ha. Kemanggala sakeng ramarane purusa antuk geng pengampura majeng ring rerama wadone.
- na. Kaigumang bawos indik-indik pakidih utawi pelegayan arep ring pasewakan sang ngidih saha dewasa pekrabkambeyan wekas;
- ca. Kecihnayang indik kapurusa utawi prada sentana rajeg kajejerang kapatutang ngiduh anak lanang sane kabawos pawiwaha nyeburin, tur risampun sulur pamerasan kategepin kemanggehan santana nyeburin.
- ka. Prade tan terima pejati pakrunan kamargiang jantos ping tiga.

(5) Pekerabkabean mapiteges upacara tinas apadang (puput) mapikuren duaning manut kadi ring sor :

- ha. Sajeroning kabaos ambe, kalaksanayang ring sekala niskala antuk sarana jejauman miwah pawidi widana :
 1. Jejauman pinaka ngambe /ngadungang kayun soang-soang pakulawangan wadone;
 2. Widi widana pinaka pejati niskala nunas wadone ring pamrajan kamulannya.
- na. Sajeroning baos kerab kambe pelaksana ring sekala :

1. Antuk panyaksi krama banjar, duaning kakerabin manawi antuk tengeran kulkul;
2. Pamekas pasnyaksi prajuru saha ngilikitayang.

Palet 2
Indik Nyapian
Pawos 42

- (1) Pawiwahan presida kawusang malarapan antuk palas marabian utawi kapademan.
- (2) Wusan mapikuren riantukan salah sinunggil lina mapiteges balu, mekadi balu lanang utawi istri.
- (3) Palas merabian inggih punika sangkaning mawiwit wicara.
- (4) Sang ayat palas merabian patut atur supaksa pailikitan riin ring sang rumawos (pengadilan negeri) wastu tinas apadang pamutuse kabawos nyapian, wuku prajuru / dulu nyiarang kawentenannya ring desa saha keni pamelin kulkul manut pararem.

Pawos 43

- (1) Tata cara palas marabian sekadi ring sor :
 - ha. Naur prebeya pesaksi sinalih tunggil sami matenga;
 - na. Pagunakaye polih pahan pada;
 - ca. Pabekel tadtadan soang soang kauasang niri-niri, skewanten indik warisan kekuasang antuk purusa;
 - ra. Ngawuruhin miwah ngupajiwa pretisentana manut swadarmaning guru rupaka;
 - ka. Naur pamidanda panumbas kulkul manut pararem;
 - da. Ngelung jinah blong manut logika prajuru/dulu;
- (2) Prade riwekas sang palas kecihna adung malih, patut :

- ha. Ngamargiang pawiwahan malih
- na. Kadende nikel sakeng palase.

Pawos 44

- (1) Sang balu kabinayang dados :
 - ha. Balu luh wit sentana (sentana rajeg) miwah balu luh boya sentana;
 - na. Balu muani kapurusa (wit sentana) miwah balu muani nyeburin (boya sentana nyeburin).

- (2) Swadarmaning balu inucap patut :
 - ha. Ngemangehang pati brata tan patut ngamargiang paradara/drati krama
 - na. Nguwasayang waris gunakaya, tan dados ngadol, ngadeang, makidihang lan siosan puniki, sajawaning kabebasan skeng piangk utawi kulawarga pinih tampek sakeng rabine prade okane kantong alit-lit.
 - ca. Kengin ngidih sentana prade wenten kecumpuin antuk kulawarga sinanggeh kapurus;
 - ra. Kewenangan mawiwaha malih yen wenten kabebasan manut aksara ring ajeng.

- (3) Balu kaucap tan pageh sekadi ring sor :
 - ha. Drati krama utawi paradara;
 - na. Matilar sakeng pakubon tan pasadok jantos 6 (enem) sasih;
 - ca. Lempas ring swadrma sawos-sawosan tan prasida ngehehin salah maprewerti marep ring pituduh kulawarga puruse.

Palet 3
Indik sentana
Pawos 45

- (1) Setana wenten kalih pawos, sane kaucap pretisentana miwah sentana peperasan.
- (2) Pratisentana inggih punika sentane sane metu saking pawiwahan kapatut.
- (3) Prade pawiwahan tan ngewetuang sentana kengin ngidih sentana antuk upasaksi sekala-niskala sane kewastanin sentana peperasan.
- (4) Prada pawiwahan tan kapatut ngewetuang sentana, mangda tan katun kawastanin babinjat utawi astra patut kamanggala antuk panyangas kara.
- (5) Sentana rajeg inggih punika, pratisentana wadon (pradana) sane kemanggehang lanang (puruse) tur ri sampun ngelaksanayang pawiwahan nyeburin.
- (6) Sang sane kaarsayang sentana rajeg inucap wiwit (5) inggih punika:
 - ha. Pratisentana wadon tunggal utawi silih sinunggil pratisentana wadon yening makasami pratisentana wadon;
 - na. Sampun kemanggegan dados pretisentana (purusa);
 - ca. Kapawiwahan kaceburin, kautsahayang antuk jatma sane maagama hindu utawi jatma sane maagama siosan sane sampun ngelaksanayang pararisuda raga utawi sudi wadani;
 - ra. Sane manggehang sentana rajegpatut masadok ring I prajuru banjar tur I klian banjar patut nyiarang ring banjar saha ngaturang ring prajuru desa pakraman.

Pawos 46

- (1) Ngangkat sentana manut dudonan patut maka cihna artha brana pamerasan sane kesaksiang sekal niskala.

- (2) Sapa sira ugi krama pacang ngidih sentana patut masaadok ring bendesa sanistane asasih sedurung pamerasan.
- (3) Bendesa kewakilin antuk klian banjar nyiarang ring sawidangan desa, sang sapa sira ugi rumaksa tan lina mangda masengker kalih wuku sedurung pamerasan masadok ring bendesa adat.
- (4) Prajuru/dulu desa digelis mawosin saha ngicenin pamutus nepet ring catur dresta miwah pararem.
- (5) Prade sulur paperasan tan manut kecaping ajeng, prajuru/dulu desa wenang ngandeg sang pacang makarya, saha ngicenin pamutus mangda kapuputang riin bebaosan sulur utawi wicaranya.

Pawos 47

- (1) Paperasan sane kapatut ring desa risampun maka cihna :
 - ha. Widi widana pamerasan;
 - na. Kesaksian antuk prajuru desa sane makelingin utawi ngilikitayang;
 - ca. Kasiarang ring wewidangan desane.
- (2) Sane kapatut peras anggen sentana kadi ring sor :
 - ha. Jatma maagama hindu;
 - na. Kulawarga sakeng purusa, prade tan wenten kengin saking wadon, yening taler tan wenten wawu kengin sakama-kama (saking kayun);
 - ca. Kautamayang saking waris pancer kapurusa;
 - ra. Sinalih tunggil mawiwit saking kulawarga tunggal sanggah utawi mrajan, paibon lan dadia, utawi ngambil anak tios sakewanten maagama hindu.
- (3) Kengein ngangkat sentana langkung ring adiri, lanang wiadin wadon.

Palet 4

Indik Warisan

Pawos 48

- (1) Warisan inggih punika artha brana saha ayah-ayahan ngupadi sukerta sekala niskala saking kaluhurannya arep ring turunannya.

- (2) Karang sinanggeh warisan luire :
 - ha. Due tengah, mekadi tegal ayahan desa, kahyangan, pasuka siwa karana, lan sane siosan;
 - na. Pangunakayan, tadtadan/jiwa dana, hutang piutang.
- (3) Wawu kengin kebaos warisan prade wenten :
 - ha. Sang mapiturun (pawaris);
 - na. Katurunan (ahli waris)
 - ca. Artha brana tetegenan (ayah-ayahan) makecihna warisan.

Pawos 49

- 1. Ahli waris, Luire :
 - ha. Pratisentana purusa;
 - na. Pratisentana (sentana rajeg)
 - ca. Sentana paperasan (lanang/wadon)
- 2. Prade tan wenten sekadi ring ajeng kang sinanggeh ahli waris :
 - ha. Turunan purusa pernah ngunggahang mekadi rerama lanang, pekak, selanturnia, rerame misan mindon;
 - na. Turunan purusa pernah ke samping mekadi kaponakan dimisan miwah mindon.
- 3. Swadarmaning ahli waris patut :
 - ha. Nerima saha ngutsahayang tetamian pahan kaluhurannia, mekadi ngempon sanggah/mrajan, pura, pangupakarannia miwah ayah-ayahan pawaris;
 - na. Ngabenang pawaris saha nglanturang upacara-upacac pitra;
 - ca. Naurin hutang-hutang pawaris manut panglokika.

Pawos 50

Munguwing waris kewaris ring Desa Pakraman Susut Kaja

- (1) Ri sampun kalaksanayang pitra yadnya alan hutang-hutang pawaris buntas katawur, wawu warisan dados kepah.
- (2) Para ahli waris sami polih pahan sangkaning pangunakaya, sajawaning karang/tegal ayahan desa kaemong antuk ahli waris kang sinanggeh krama ngarep.
- (3) Sinalih tunggil ahli waris kengin tan polih pahan prade :
 - ha. Nilar kawitan lan sesananing agama;
 - na. Alpaka guru rupaka;
 - ca. Sentana rajeg kesah mawiwaha utawi pratisentana nyeburin soang-soang kabaos ninggal kadaton.
- (4) Boya ahli waris, kengin muponin hasil manut dudonan, luire:
 - ha. Sentana luh, selami durung kesah mawiwaha;
 - na. Bulu luh wiadi muani nyeburin (soang-soang boya sentana)
- (5) Pawaris kengin maweweh ri kala maurip pinaka jiwa dana, tatadan/bekel, maka cuhna paweweh tetep ring okane sane kesahmawiwaha.

Pawos 51

- (1) Prade sajeroning pakulawargan wenten ahli waris langkungan ring adiri patut;
 - ha. Kawentenang paigum indik pahan waris inucap;
 - na. Yan tan prasida katunasang tatimbang ring prajuru / Dulu-dulu;
 - ca. Prade taler tan wenten cumpu ring panepes Prajuru, patut kadauhang ring Kertha Desa; prade taler tan kacumpuin, kengin katunasang ring Sang Rumawos (Pengadilan Negeri)
- (2) Prade karang inucap keputungan, patut Prajuru/Para Dulu nibakang ring :
 - ha. Sang sinanggeh ahli waris manut pawos 50;
 - na. Sang kengin anggen sentana anut pawos 54 (2) miwah (3);
 - ca. Prade taler tan wenten cumpu ring panepas kerta Desa, kengin, kautsahayang ring sang Rumawos (Pengadilan Negeri)

- (3) Prade jantos karang desa kepah utawi kasepih, patut soang-soang nedunin makrama desa ngarep.

SAD SARGAH
SUKERTA TATA PALEMAHAN

Palet 1
Indik Bhaya

Pawos 52

- (1) Parindikan bhaya luire: jiwa bhaya, artha bhaya (kependungan) dura cara ring agama.
- (2) Sang manggihin kahanan jiwa bhaya, patut nepak kulkul bulus mapitulung manut pawos 15 (2) aksara na.
- (3) Prade ring desa kahanan jiwa bhaya, patut desane nngaturang bhuta yadnya tur sang mayanin katur ring sang ngawiwenang.
- (4) Prade wenten jatma mamisuh utawi nguman-uman jatma tios, kakenin pamidanda beya pecamil tebasan prayascita.

Pawos 53

- (1) Sang manggihin kehanan artha bhaya (kamalingan), patut ngukul mapitulung anut ring pawos 15 (2) aksara na, utawi sang kemalingan atur supeksa ring Prajuru dulu desa sane pacang nandanin saha mawuwuh penyangaskara prade wenten jatma gemaling barang sinaggeh suci.
- (2) Praningkahe mapailon ring dusta kebawos sasuron, utawi prade wenten jatma manggihin maling tan nyadokang ring Prajuru jantos jatma sios nyaduang, patut kadanda kadi dandaning maling, sekueh pengargan wit manut cacakan, tur prade jantos ping tiga melaksana asapunika wenang kasukserah ring sang ngawiwenang.
- (3) Prade wenten jatma ngerereh reramon, minakadi daun kelapa, ron, tan pasadok ring sang nruwenang, prade kacunduk (ketara) patut kadanda kadi dandaning maling.

- (4) Yening wenten jatma ngranjingin pakubon wiadin pakarangan rikala suwung, mawastu sang madruwe karang kaicalan, wenang jatma inucap katuwekang antuk madewa saksi ring Pura Bale Agung.
- (5) Mangda tan katuwekang manut ring ajeng, asing-asing ngranjingin kubon jatma sios patut :
 - ha. Matengerean suara (makaukan) ;
 - na. Nyantos sang nruwenang karang rawuh utawi masadok ring pangapit pinih tampek, maka buatan pengeranjinge ;
 - ca. Pamedal karangnia kasawenin, maka cihna pangarah rikala suwung.

Palet 2

Indik Karang lan Tegol

Pawos 54

- (1) Krama Desa pangemong karang ayah desa (tanah sane tan keni tigasana) patut ngawatesin karang inucap antuk pagehan/turus utawi tembok mangda pekantenannya asri.
- (2) Wates sisi kaler miwah kangin patut kekaryanin antuk sang ngamong karang ayahan inucap, sane mawasta gegaleng keluan, sejawaning tanah pecatu, tegal, carik utawi tanah padruweyan ngrage, sane kapiare watase sisi kelod miwah kauh, reh punika mawasta gegaleng keteben.
- (3) Prade kerasayang pagehan/turus inucap ngelikadin, yan pada arsa penyandinge, kengin wetese ngangge pinget kewanten kesaksi antuk Prajuru Desa utawi prancihna pal saking Agraha.
- (4) Prade wenten karang kebebeng mangda keutsahayang wenten margi.

Pawos 55

- (1) Sinalih tunggil Krama Desa/Banjar tan kalugra ;
 - ha. Nglah-alah margi , tegal ayahan desa, karang desa ;
 - na. Ngalah-alah tanah tegak Kahyang, lan Setra, sekancan tegak sinanggeh suci

- (2) Prade wenten sekadi ring ajeng, sang ngalahlah patut ngawaliang tanah inucap saha pamidanda sapatutnya kedulurin upekara ring genah suci sane kelalah.

Palet 3
Indik Pepayonan
Pawos 56

- (1) Ngawit nandur papayonan, tanem tuwuh patut adepa agung ngajeroang saking wates, prade jantos ngaliwat wates wenang kasepat gantungin.
- (2) Yening papayonan ngukulin, semaliha mewastu mayanin kepisaga patut kewara antuk paiguman ping ajeng prasida sang nruwenang wit ngerebah utawi notor.
- (3) Prade sampun kewara taler tan wenten usaha sang nruwenang wit, sang rumasa katetahan/kejerihan wenang mesadok ring prajuru, tur ri sampun keparitatas kelugra ngicalang wit inucap.
- (4) Sang keni pamidanda panyangaskara saha prabeya manut pararem arep ring wawangunan sang kerubuhan luire:
 - ha. Sang nruwenang wit sinanggeh mayunin, prade pungkut ngarubuhin wawangunan krama sios;
 - na. Sang notor, munggul utawi ngarebah taru tur ngarubuhin wawangunan krama tios.
- (5) Krama Desa patut ngamanggehang kawerdian tanem tuwuh sane ngawinang desane asri tur lestari.

Palet 4
Indik Wewalungan
Pawos 57

- (1) Sahananing warga desa sane mamiara wawalungan (bawi, ri sampun mabelas utawi banteng lan selantur ipun sampun masaluk tali), patut sayaga nitenin

negul/ngelogor mangda tan ngrusakin karang utawi pabianan krama sios. bilih-bilih jantos ngletehin Kahyangan.

- (2) Prade wenten wawalungan malumbar utawi ngeleb ngerusakin karang/pabianan krama sios, ri sampun keware kengin kataban tur kadanda ngawaliang wit sane rusak saha nawur penebas papiaran tetabanan anut pengelokikan Prajuru Desa.
- (3) Prade jantos ngletehin tegak suci minakadi Pamrajan (Sanggah Kemulan), ri sampun kaparitas antuk Prajuru wenang sang nruwenang kedanda mabuhu agung tebasan prayascita, durmanggala utawi Pancasata iwak bebek belang kalung, prade jantos ngeletehin Kahyangan Tiga utawi Pura Pamaksan.
- (4) Krama desa patut nyerayanin wewalungan miwah sarwa prani, tan kapatungang maboros paksi miwah nuba ulam lan siosan punika.

Palet 5

Indik Wewangunan

Pawos 58

- (1) Nyabran ngwangun patut :
 - ha. Masadok rig prajuru, ping ajeng prade wewangunan nganinin wates;
 - na. Ngangge Asta Bhumi miwah gagulak Asta Kosala-kosali, sanistane manut patitis niskala;
 - ca. Tan nyayubin ka pisaga.
- (2) Prade wewangunan jantos nyayubin bilih-bilih temboke ring telenging wates ri sampun kawara tur kasadokang ring prajuru, wenang kadanda manut paraem, saha tembok inucap kagubar utawi sanistane manda kakaryanang abangan.

SAPTAMA SARGAH
WICARA LAN PAMIDANDA

Palet 1

Indik Wicara

Pawos 59

- (1) Sane wenang mawosin makadi mutusang wicara ring desa inggih punika Prajuru Desa sinanggeh kerta desa :
 - ha. I Klian Banjar Desa Pakraman Susut Kaja, pradene sang mawicara sane patunggilan banjar.
 - na. Bandesa Desa Pakraman Susut Kaja prade sang mawicara sami-sami ring patunggalan Desa Pakraman.
- (2) Tata dudonan maosin saha muputang wicara warga desa kadi ring sor :
 - ha. Kaping ajeng kabaosin antuk Klian Banjar;
 - na. Tan cumpu ring panepas klian banjar katunasang ring panglingsir banjar;
 - ca. Paruman banjar tan kanutin kengin nunasang ring Bandesa Desa Pakraman;
 - ra. Bandesa Desa Pakraman tan presida muputang katincepang ring panglingsir sinanggeh Kerta Desa;
 - ka. Prade taler pamatut panglingsir desa tan kacumponin katunasang ring paruman desa, sinanggeh wasananing pamutus ring desa.

Pawos 60

- (1) Sahanan wicara mawiwit kecorahan sakaluire sinanggeh nungkasing daging Awig-awig, pasuaran miwah pararem Desa utawi banjar, Prajuru utawi Dulu Desa patut digelis mawosin tan nyantos pesadok.
- (2) Sejaba wicara kadi ajeng patut nyantosang pesadok sang nunas bawos
- (3) Panepase patut pastika nyatenang iwang patut melarapan Tri Premana (saksi, lekita, bukti) miwah tan maren nepek ring Catur Dresta.

Palet 2
Indik Pamidanda
Pawos 61

- (1) Desa utawi banjar wenang niwakang pamidanda ring warga desa utawi banjar sane sisip.
- (2) Paniwak inucap kamargiang olih bandesa utawi Klian Banjar.
- (3) Bacakan pamidanda luire :
 - ha. Ayahan panukun kesisipan;
 - na. Danda arta (dosa, danda saha panikel paturunan);
 - ca. Rarampagan ;
 - ra. Kadaut karang ayahannya, utawi kasepekan;
 - ka. Penyanggaskara.
 - da. Kawaliang pipil nyane (kawusang makrama).
- (4) Pamidanda sane katiwakang patut masor singgih manut ring kesisipane.
- (5) Jinah utawi raja brana pamidanda ngeranjing dados druwe Desa utawi Banjar.

Pawos 62

- (1) Krama sane langkung ring tigang paruman ngelantur tan nawur urunan miwah dadendan wenang karampag;
- (2) Rarampagan ngangge tata cara kadi ring sor :
 - ha. Kalaksanayang antuk kasarengin antuk Krama Desane sekehe tigang diri maka saksi;
 - na. Sang ngerampag saking darsana ngambil barang utawi nyawenin tanem tuwuh, akehnya manut ring hutang sang karampag;
 - ca. Prajuru mapiteketang mangda barang-barang sane karampag digelis katebus, masengker awuku ring rahina pacang kaadol.

- ka. Tan ngeninin saluwir barang sane patut inggilang manut agama miwah mademang pangupa jiwa sang kerampag;

Pawos 63

- (1) Prade sang pacang karampag ngewara (ngalangin) pamargi inucap mawastu sampun tan nganutin awig-awig desa wenang karang desa sane kagenahin kadaut antuk desane utawi kasepekan.
- (2) Semalih yan purun taler ngalangin paridabdab kadi ring ajeng tan wenten pamargi sajawaning kawaliang pipil nyane (kauwusang makrame)
- (3) Pamidanda inucap ring ajeng keni buntas risampun sang kekeninin :
 - ha. Nunas geng pengampura ring krama desa riantukan nguak pasubaya (pararem) pecak;
 - na. Nawur pangargan panguwak pasubaya duk pacang karampag kadulurin parayascita.

ASTAMA SARGAH NGUWAH-NGUWUHIN AWIG-AWIG

Pawos 64

- (1) Nguwah-nguwuhin Awig-awig Desa puniki kamargiang antuk paruman Desa Pakraman Susut Kaja.
- (2) Paruman inucap mangda kadasarin antuk pakarsan krama Desa Pakraman yadiastun kamedelang antuk prajuru sinunggal wiadin sinarengan.
- (3) Awig-awig puniki kamargiang ngawit kaingkupin (kararemin).

Pawos 65

- (1) Sakaluining sane wenten saderengnya patut kaanutang ring sadaging Awig-awig puniki

- (2) Sakaluring sane during kebawos sejeroning Awig-awig puniki patut kamargiang manut tata cara sane sampun ketah mamargi kadulurin antuk pararem-pararem.

NAVAMAS SARGAH

SAMAPTA

Pawos 66

- (1) Awig-awig puniki kawastanin awig-awig Desa Pakraman Susut Kaja
- (2) Awig-awig puniki kamargiang ngawit kasungkemin ring paruman.

Pawos 67

- (1) Sakaluir sane wenten saderengnya patut kaanutang ring sadaging awig-awig puniki.
- (2) Sakaluring sane during kabaos sajeronig awig-awig puniki patut kamargiang manut tata cara sane sampun katah mamargi kadulurin antuk pararem.

Pawos 68

- (1) Awig-awig puniki kasungkemin ring paruman duk rahina pinanggal/
pang.....Sasih.....Icaka,warsa.....tanggal.....masehi.....ring Bale
Desa Pakraman Susut Kaja.
- (2) Awig-awig puniki kalinggatanganin antuk Prajuru Desa Pakraman Susut Kaja,
saha kasaksiang olih Kepala Dusun Susut Kaja, Perbekel Desa Susut, lan Camat
Susut tur Bupati Bangli pinaka murdha Pamikukuh.

(3) Luir sang ngalingga tanganin:


ha. Kapertama Prajuru Desa:


Bangsa Pakraman Susut Kaja
A. OKA WINAYA

1). Penyarikan


I NENGAH SUANTA

3). Kelian Banjar Susut Kaja


NGAKAN PUTU RAI

4). Juru Raksa


I WAYAN CANDRA

na. Kaping kalih kepala Dusun Susut Kaja, Prebekel Susut, Camat Susut pinak

Saksi :

2). Prebekel Susut

1). Kepala Dusun Susut Kaja

A.A. KETUT ANGGRADIGUNA

I WAYAN NAWA

3). Camat Susut

ANAK AGUNG BINTANG ARI